



遠西砲術畧序

洋学文庫  
文庫 8  
C 15



<42-4554>

遠西砲術畧序

泰西砲術之行。蓋三百年於茲矣。其始傳於我邦。方在天文群雄割據之際。而摧堅折銳。莫弗賴此器焉。既而膺國家龍興之運。偃武脩文。與天下休息。而後砲術之用。徒施諸演技之場。競其中否。以粧飾太平耳。彼泰西則不然。邊烽日警。戰爭無止。故於此術。最致思焉。既悟火繩不便兩戰。代之以燧石。而其製造之精。運用之巧。又有倍蓰於曩昔者。亦可以驗東西治亂之候矣。抑其以石代繩。實係我永祿十年事。

惜哉使其僅在二十年之前。則我邦之傳石砲。而不知繩砲也必矣。雖然。物之隱顯明晦。自有數而存焉。我三百年所未講之石砲。方始顯於今日。而併其製造典使用。亦徃々有傳之者。是端使彼百鍊千摩。精其技於數百年間。而我談笑袖手。受之於一朝也。且速棄其舊。新之圖焉。然而世之砲家者流。動輒主張其術。反視斯種。以爲洋外異流。不復問其技之精粗。雖曰清平之久。習慣使然。抑何不思之甚也。是同蒼大家氏之所以有遠西砲術畧之著也歟。嗟夫使此

器固出於我邦之製。雖余亦不得不揚此而抑彼也。今則其法前後均出於彼國。而墨守其舊。不從百鍊之精者。余安得不異而恠之哉。若夫大砲。我邦特傳大將軍佛郎機二種耳。此書所載。曰船砲。曰城砲。曰營砲。曰野戰砲之類。皆是行軍不可闕之要具矣。而世之講者。何其寡々也。吾重為砲家惜之。

弘化三年龍集丙午閏五月磐溪大槻崇撰



